

► *Remitido*

# QUO VADIS ?????

Atrobe un aña di turbulencia, den cual intriga y mala fe ta domina futuro di Carnaval di Aruba.

Hendenan sin escrupulo, golos pa placa, ta trata na prostitui nos musiconan.

Weganan sushi cu ta worde hunga, den un esfuerso, pa crea desunion y dicta.

E conferencia di prensa cu a tuma lugar den Bahia, supuestamente mester tabata uno informativo, cu a cuminsa un tiki confuso.

Tension tabata un di e factornan. Pero tog pronto reunion a coge su draad y bai den e direccion cu ASOMA kier a dirigie. Hopi pregunta a worde lansa cu no tabata al caso, pero tog a worde contesta.

Hasta despues di tanto aña di existencia, nos legalidad a worde cuestiona. Ki ridiculo!

E dos topiconan puntonan cardinal tabata:

1. Tene Calypso Roadmarch na San Nicolas.

2. Sali na defensa di nos musiconan, y nos organisacion.

Pa loke ta trata punto 1, sin a participa den e reunion convoca dor di Sr. Dochi Lee, entre SAC y ASU, -por lo pronto pueblo di

San Nicolas y ASOMA a canta victoria. Nos ta bisa esaki, como cu ya nos por a tende di Minister di Cultura y Deporte Ramon Lee, cu den cuadro di modernizacion, lo bai pone tapijt di yerba artificial den Joe Laveist Sport Park. Esaki lo implica, cu den futuro lo no por tene tipo di eventonan asina mas den e complex deportivo. Nos ta corda si cu den pasado artistanan Americano e grupo di "SINBAD" a haña permiso di e gobierno di Aruba, pa por a tene nan festival musical den "Stadion Guillermo Trinidad", e tapijt di yerba no a sufri ningun dño. Hasta pida di un muraya a worde kibra pa facilita e Mericanonan uso di e facilidad mencionada.

Naturalmente nos lo bai tende cu e decision ei tabata di e gobierno anterior, habriendo caminda pa den futuro tog displaza e evento di Calypso/Roadmarch, como cu SAC ta bai traha su propio Carnaval Center. Tristo si, cu politica atrobe a cai aden, y na un forma fuera di tur credibilidad, den oranan di anochi, riba e mes un dia cu ASOMA a tene su rueda di prensa, SAC y ASU hunto cu Dochi Lee, representando Min-

ister Ramon Lee, a bulldoze un acuerdo, den cual aparentemente SAC a sali e ganador.

Esaki hañando subsidio di gobierno, cu a paga ASU Afl. 17.500.—, pa uso di Joe Laveist Sport Park, y pa cubri gasto di stage y sound. E Afl. 33.000.— na premio, SAC a haña un sponsor pe. Nos di ASOMA no ta rabia pasobra Calypso/Roadmarch Festival a bai San Nicolas, al contrario, esei tabata un di e puntonan di salida den e negociacion cu SAC.

E directiva actual di ASOMA, aña pasa, a pidi Minister di Cultura, un subsidio substancial pa por a organisa Fiesta di "Dera Gai" cu ta algo cultural di nos pueblo, y pa prome biaha a worde organisa dor di ASOMA. Nos a haña un contesta negativo riba esaki.

Locual si te cu awe nos no ta di acuerdo cune, pa cuminsa; t'e forma humiyante cu cual nos a worde trata dor di directiva di SAC. E prome reunion informativo entre SAC-ASOMA a tuma lugar dia 18 di october 2002, durante cual den forma di "take-it or leave it", y sin previo dialogo e Presidente di SAC a participi na nos nan decision

unilateral, cu Calypso/Roadmarch Contest ta bini Playa y cu e sistema di premiacion a cambia. E ultimo ponencia ta ensera cu e ganador absoluto di Calypso lo recibí Afl. 10.000 na premio, igual suma di placa e ganador di Roadmarch tambe lo haña. E banda ganador lo recibí Afl. 5000.- na premio, e y dos ta recibí Afl. 2500.—, y lo tin un tercer premio, na razon un suma di Afl. 1500.- cada uno.

Musiconan tene bon cuenta cu lo siguiente, pa despues no bin reclama directiva, cu bo no a worde avisa. SAC lo NO paga ningun banda, ningun compositor, ningun arreglista y ningun cantante pa nan participacion den e "PRE-FINAL".

Igualmente esaki ta conta p'e banda-, cantante-, compositornan, etc. cu ta participa den e =FINAL= y NO cai den premiacion.

Si nos compara e premiacion di Afl. 33000.— cu a worde poni disponibel p'e evento di dia 8 di februari benidero, cu e suma di placa, cu a base di e convenio di aña 1998 tabata worde paga n'e participantenan, incluso premionan p'e ganador di e Calypso/Roadmarch Contest, esaki

tabata e suma, dependiendo di e cantidad di participantenan ariba mencionada di aproximadamente Afl. 92.000.—

Pues un diferencia alrededor di Afl. 60.000 menos cu locual e participantenan tabata recibí. Esaki ta nifica cu loke ASOMA den pasado a bringa pe, sin previo negociacion, ni aviso a worde a elimina, kitando asina un pida pan extra pa e musico, talbes hasta di boca di nan yiunan. Nos sa cu na Aruba, hopi di e musiconan no ta profesional, den e sentido cu nan no ta biba solamente di e profesion como musico, pero ta traha den dia, pa despues mas bien den nan ora liber, anochi gana un pida pan extra cu musica.

(mañan nos ta sigui cu e di dos parti)

(1er parti)  
**Pa ASOMA**